

Siunnersuut

uunga

Kalaallit Nunaannut angallannermut inatsisip allanngortinneqarnissaanut inatsit

(Kalaallit Nunaanni misissuisarnermik aaqqissuussineramik pilersitsineq)

§ 1

Kalaallit Nunaannut angallannermut inatsimmi, tak. inatsimmut nalunaarut nr. 995, 26. oktober 2009-meersoq, tulliuttunik allannguisoqassaaq:

1. § 6, imm. 2, oqaaseqatigiit 1.-mi »qamut, qamutinit motoorilinnit kalinneqartussatut aalajangiussaq« imatut allanngortinneqassaaq: »qamutit kalittakkat«, aamma »misissuineq« imatut allanngortinneqassaaq: »misissuineq«.

2. § 6, imm. 3, oqaaseqatigiit 1.-mi »misissuineq« imatut allanngortinneqassaaq: »misissuineq«.

3. § 6-ip kingorna ilanngunneqassaaq:

»**§ 6 a.** Aqqusinertigut Angallannermut Aqutsisoqarfiup qamutit motoorillit aamma qamutit kalittakkat misissornissaat siunertaralugu unitsissinnaavai, aammalu tassunga atatillugu taakku sumiiffimmut misissuiffissamut innersuullugit aammalu ingerlallugit. Tassungalu atatillugu Aqqusinertigut Angallannermut Aqutsisoqarfik § 38, imm. 3 naapertorlugu usinik ilisaqarnikkut misissuisinnaavoq.

Imm. 2. Imm. 1 malillugu misissuineq naammassineqarsinnaanngippat, Aqqusinertigut Angallannermut Aqutsisoqarfiup qaqugukkulluunniit piumasarisinnaavaa, qamutit imaluunniit qamutit kalittakkat misissuiffimmi taaneqartumi misissorneqassasut.

Imm. 3. Aqqusinertigut Angallannermut Aqutsisoqarfik qamutininik imaluunniit qamutininik kalittakkanik uninngasunik misissuisinnaavoq, piginnittoq imaluunniit atuisoq tamatumunnga akuersippata. Piginnittoq imaluunniit atuisoq akuersissanngikkaluarpat, Aqqusinertigut Angallannermut Aqutsisoqarfiup piumasarisinnaavaa, qamutit misissuiffimmi taaneqartumi misissorneqassasut.

Imm. 4. Qamutit imaluunniit qamutit kalittakkat imm. 1-3 naapertorlugit misissuinermit akuerineqanngippata, atorneqarnissaat Aqqusinertigut Angallannermut Aqutsisoqarfiup inerteqqutigisinnaavaa.

Imm. 5. Imm. 1-3 malillugit misissuineq pillugu Transportministeri malittarisassanik erseqqinnerusunik aalajangersaasinnaavoq, Aqqusinertigut Angallannermut Aqutsisoqarfiup imm. 1 malillugu qamutitut motoorilinnut aamma qamutitut kalittakkanut innersuussisinnaanera aammalu ingerlatsisinnaanera pillugit, tassunga ilaatillugit misissuiffinnik aamma qamutitik ilusiliineq aamma nalunaaqutsiineq.«

§ 2

Inatsit atuutilissaaq ulloq [1. januar 2027].

Inatsisissatut siunnersuummut oqaaseqaatit

Oqaaseqaatit nalinginnaasut

Imarisai	
1.	Aallaqqaasiut
2.	Inatsisissatut siunnersuutip immikkoortui pingaarnerit
2.1.	Qamutitik motoorilinnik aamma qamutitik kalittakkanik misissuineq
2.1.1.	Inatsisit atuuttut
2.1.2.	Transportministeriap isummersuutai aamma aaqqissuussineq siunnersuutigineqartoq
3.	Pisortanut aningaasaqarnikkut kingunissai aamma atortuutilersitsinerup kingunissai
4.	Inuussutissarsiortunut il. il. aningaasaqarnikkut aamma allaffissornikkut kingunissai
5.	Innuttaasunut allaffissornikkut kingunissai
6.	Silap pissusaanut kingunissai
7.	Avatangiisinut aamma pinngortitamut kingunissai

8.	EU-mi inatsiseqarnermut tunngasut
9.	Oqartussaqaarfiit aamma kattuffiit il. il. tusarniaaffigineqartut
10.	Skema eqikkaasoq

1. Aallaqqaasiut

Kalaallit Nunaat angallannermut inatsisitaappaarpoq 1966-imi, taamanikkut qamutit nalunaarsorneqarsimasut 1.200-t missaanniipput. Ullumikkut amerlassusaat 14.000-it angusimavaat. Angallannerup annertusiartornerata misissuisarnermik aqqissuussinermik pisariaqartitsilersitsivoq, qamutini teknikkikkut piumasaqaatit Kalaallit Nunaanni angallannermut inatsimmi aammalu inatsit taanna malillugu malittarisassani aalajangersarneqarsimasut naammassineqarsimanissaannut isumannaarisussamik.

Inatsisissatut siunnersuutikkut, danskit transportministeriata aammalu kalaallit Ineqarnermut Attaveqaasersuutitut, Isorliunerusunullu Naalakkersuisuata januar 2025-mi isumaqatigiissutaat pilersinneqarpoq, tassani aalajangiunneqarsimalluni Kalaallit Nunaanni aqquserngit sinaanni misissuisarnissamik aqqissuussinermik pilersitsinissaq. Siunertaavoq Kalaallit Nunaanni pissutsini immikkuullarissuni qamutit teknikkikkut qanoq ittuunerannik misissorneqartarnissaasa isumannaarneqarnissaa. Isumaqatigiissut taanna Kalaallit Nunaanni qinersinerup kingorna maj 2025-mi naqissuseqqinneqarpoq.

Piffissani aalajangersimasuni misissuisarnermut Kalaallit Nunaanni atorineqanngitsumut aammalu allaffissornikkut oqimaatsumut sanilliullugu aqqissuussinerup allaanerussutigivaa, aqquserngup sinaani eqaannerusumik aammalu naapertuunnerusumik misissuisinnaaneq, sumiiffimmi aqqissuussaannermut aammalu pisariaqartitsinermut naleqqunnerusumik.

Aqqusinertigut Angallannermut Aqutsisoqarfik tassaavoq oqartussaqaarfik Danmarkimi misissuisarnermi malittarisassanik aqutsisuusoq. Taamaallilluni Aqqusinertigut Angallannermut Aqutsisoqarfik Kalaallit Nunaanni qamutit qanoq innerinik misissuinissap isumannaarneqarnissaanut naleqquttunik piginnaasaqarpoq. Taamaattoq Kalaallit Nunaanni ullumikkut politiit kisimiillutik qamutiniq unitsitsisinnaapput, qamutit ajoquteqarnersut aammalu amigaateqarnersut misissorneqarnissaannut.

Taamaattumik inatsisissatut siunnersuutip siunertaraa, Aqqusinertigut Angallannermut Aqutsisoqarfiup Kalaallit Nunaanni aqquserngup sinaani qamutininik misissuisarnissaa pillugu malittarisassanik aalajangersaanissaq.

Aqqusinikkut angallannermut oqartussaaffik sulii Kalaallit Nunaannit tiguneqarsimanngimmat, suliaq naalagaaffeqatigiinnut suliaassatut ingerlanneqarpoq.

Oqaaseqaatigineqarpoq, inatsisissatut siunnersuummut oqaaseqaatini angallannermut inatsimmut innersuussisoqaraangat, Kalaallit Nunaanni angallannermut inatsit pineqartarmat, alla taaneqarsimanngikkaangat.

2. Inatsisissatut siunnersuutip immikkoortui pingaarnerit

2.1. Qamutininik motorilinnik aamma qamutininik kalittakkanik misissuineq

2.1.1. Inatsisit atuuttut

Angallannermut inatsimmi § 6, imm. 1-imi allaqqavoq, politiit qamutininik unitsitsisinnaasut aamma kukkuneqarnersut aammalu amigaateqarnersut misissorsinnaallugit kiisalu aquttoq inatsisit malillugit qamutininik ingerlatsisinnaanermut piumasaqaatinik naammassinnissimanersoq misissorsinnaallugu.

§ 6, imm. 2, oqaaseqatigiit 1.-mi, allaqqavoq, politiit qaqugukkulluunniit piumasarisinnaagaat, qamutit motoorillit imaluunniit qamutit, qamutininik motoorilinnit kalinneqarnissamut aalajangiussat, misissugassanngussasut, angallannermut inatsimmi piumasaqaatinik imaluunniit inatsit tunngavigalugu aalajangersakkanik naammassinninneri pillugit nalilersorneqarnissaat siunertaralugu.

§ 6, imm. 2-mi, oqaaseqatigiit 2.-ata kingunerivaa, taamaattunik qamutininik piffissami aalajangersimasumi misissuineq pillugu transportministeri aalajangersakkanik aalajangersaasinnaasoq.

Piginnaatitsineq tamanna Aqqusinertigut Angallannermut Aqutsisoqarfimmiippoq, Aqqusinertigut Angallannermut Aqutsisoqarfiup suliaasai aamma piginnaatitaaffii aamma § 4 malillugu maalaaruteqarsinnaaneq pillugit nalunaarut nr. 787, 18. juni 2025-meersoq malillugu.

Aqqusinertigut Angallannermut Aqutsisoqarfiup piginnaatitsineq tamanna, qamutininik motoorilinnik imaluunniit qamutininik, qamutininik motoorilinnit kalinneqarnissamut aalajangiussanik, piffissami aalajangersimasumi misissuineq pillugu aalajangersaanermut atorsimanngilaa.

§ 6, imm. 3 malillugu, politiit qamutiniq atuinnissaq inerteqqutaatissinnaavaat aammalu nummerpladii peersinnaallugit, imm. 1 imaluunniit 2 malillugit misissuinerimi piumasaqaatit atuuttut naammassineqarsimangippata. Taamaaqataa atuuppoq, qamutit imm. 2 malillugu aggersaanerup kingorna misissugassanngortinneqanngippata.

Tassa politiit kisimiillutik, ullumikkut inatsisitigut tunngavissaqarput qamutiniq unitsitsinissamut, Kalaallit Nunaanni qamutiniq teknikkikkut misissuinnissaq siunertaralugu.

§ 38, imm. 3-mi aamma allaqqavoq, usit imatut inissinneqassasut, inunnut ulorianangitsumik imaluunniit pigisanut ajoqusiinngitsumik. Imatut inissinneqarsimassapput, nikissinnaajunnaartillugit, nakkarsinnaajunnaartillugit imaluunniit pisariaqanngitsumik nipiliorsinnaajunaartillugit.

Angallannermut inatsimmi § 72, imm. 1-ip kingunerivaa, transportministerip Aqqusinertigut Angallannermut Aqutsisoqarfik piginnaatissinnaagaa, Transportministeriap ataani aqutsisoqarfimmi allami pilersinneqarsimasumi imaluunniit suliffeqarfimmi assingusumi piginnaatitsissutiniq atuutsitsinissamut, uani inatsimmi transportministerimut piginnaatitsissutigineqartunik.

§ 72, imm. 2, malillugu transportministeri, imm. 1-imi piginnaatitsissut naapertorlugu aalajangiussinerit pillugit, maalaaruteqarsinnaaneq pillugu malittarisassanik aalajangersaasinnaavoq, tassunga ilaatillugu aalajangiussinerit transportministerimut suliassanngortinneqarsinnaannginneri.

2.1.2. Transportministerip isummersuutai aamma aqqissuussineq siunnersuutigineqartoq

Danskit transportministeriata aammalu Kalaallit Nunaata Ineqarnermut Attaveqaasersuutitut, Isorliunerusunullu Naalakkersuisuata januar 2025-mi isumaqatigiissuteqarput, Kalaallit Nunaanni misissuisarnermik aqqissuussineq pilersinneqassasoq, qamutit teknikkikkut qanoq innerannik misissorneqartarnissaat siunertaralugu. Tamanna aqquserngup sinaani misissuisarnikkut pisassaaq, Aqqusinertigut Angallannermut Aqutsisoqarfimmit isumagineqartartussaq. Isumaqatigiissutaavoq, misissuinerup inernera uppersarsarneqartassasoq akuersissutiniq meqqiliisarnikkut aqqissuussinikkut, ersersitsisunik qamutit misissuinikkut akuerineqarsimaneriniq. Aqqissuussineq eqaatsoq isumannaarniarlugu, Aqqusinertigut Angallannermut Aqutsisoqarfik tamatuma saniatigut qamutiniq uninngasunik misissuisinnaanermik periarfissaqartinneqassaaq.

Tamanna tunuliaqutaralugu § 6 a, imm. 1-imi aalajangersakkamik nutaamik ilanngussinissaq, taamaalilluni Aqqusinertigut Angallannermut Aqutsisoqarfik inatsisitigut tunngavissaqalissalluni qamutiniq aamma

qamutunik kalittakkanik unitsitsinissamut aammalu aqquuserngup sinaani misissuinissamut aammalu tamatumunnga atatillugu qamutunik misissuiffissamut innersuussinissamut aammalu ingerlatsinissamut. Aammattaaq siunnersuutigineqarpoq, Aqqusinertigut Angallannermut Aqutsisoqarfik tamatumunnga atatillugu usinik inissiisimaneq pillugu misissuisinnaanissaa § 38, imm. 3 naapertorlugu.

Aalajangersakkap nutaap siunertarissavaa Aqqusinertigut Angallannermut Aqutsisoqarfiup piginnaatitaanermik pisariaqartitamik tunissallugu qamutit aqquuserngup sinaani teknikkikkut qanoq ittuunerannik misissorsinnaanissaannut. Tamatuma isumannaassavaa, Aqqusinertigut Angallannermut Aqutsisoqarfik misissuinerinik sunniuteqarluartunik naammassinnissinnaanera, qamutit teknikkikkut qanoq issusaanut tunngatillugu malittarisassanik atuuttunik eqquutsitsinermut tapertaasumik.

Aqquuserngup sinaani misissuinerup naammassineqarsinnaannginneranik pisoqarsinnaavoq, aammalu tassani paasineqarluni, misissuinerup naammassineqarnissaa naapertuuttuunani. Assersuutigalugu pisoq, qamutit sullissaqartoq ataatsimik imaluunniit arlalinnik, isumaqatigiissuteqarsimaneq naapertorlugu pisussaaffimminik naammassinnissinnaajunnaassasoq imaluunniit umiarsuarmut ikaartaammut inortuissasoq, qamutit aqquuserngup sinaani misissorneqassappata. Taamaattumillu pisariaqartinneqassalluni Aqqusinertigut Angallannermut Aqutsisoqarfiup misissuisartuisa misissuineri ajornanngitsumik aammalu naleqquttorsiortumik ingerlanneqarsinnaanerisa isumannaarneqarnissaat.

Taamaattumik imm. 2-mi siunnersuutigineqarpoq, imm. 1 malillugu misissuineq naammassineqarsinnaanngippat, Aqqusinertigut Angallannermut Aqutsisoqarfik qaqugukkulluunniit piumasarisinnaavaa qamutit imaluunniit qamutit kalittakkat misissuiffissatut taaneqartumi misissugassanngortinneqarnissaat. Isumannaarneqassaaq, misissuinerit sunniuteqarluartuunissaat aammalu qamutit teknikkikkut qanoq issusaasa illersorneqarsinnaasuunissaannik siunertap naammassineqarnissaa.

Aqquuserngup sinaani misissuisarnermik aaqqissuussinerup Aqqusinertigut Angallannermut Aqutsisoqarfiup misissuisartuisa Kalaallit Nunaanni aqquuserngup sinaani qamutunik sunniuteqarluartumik misissuinissaq pillugu angalanissaannut periarfississavai. Taamaattumik danskit transportministeriata aammalu Kalaallit Nunaata Ineqarnermut Attaveqaasersuutinut, Isorliunerusunullu Naalakkersuisuata akornanni isumaqatigiissutigineqarpoq, Aqqusinertigut Angallannermut Aqutsisoqarfimmut aamma periarfissaassasoq qamutunik uninngasunik misissuisinnaaneq.

Taamaattumik siunnersuutigineqarpoq, § 6 a, imm. 3-mi, aalajangersakkamik ilanngussinissaq, tamatuma kingorna Aqqusinertigut Angallannermut Aqutsisoqarfik qamutitik motoorilinnik aamma qamutitik kalittakkanik uninngasunik misissuisinnaanngussaaq, piginnittoq imaluunniit atuisoq tamatumunnga akuersippat. Piginnittoq imaluunniit atuisoq akuersinngippat, Aqqusinertigut Angallannermut Aqutsisoqarfiup piumasarisinnaavaa, qamutit misissuiffissami taaneqartumi misissugassanngortinneqarnissaat.

Inatsisissatut siunnersuummi § 1, nr. 3-mut oqaaseqaatinut immikkut ittunut innersuussisoqarpoq.

Imm. 1-3-mi aalajangersakkat siunnersuutigineqartut malillugit misissuinnermut atatillugu pisoqarsinnaavoq, qamutit imaluunniit qamutit kalittakkat annertuunik kukkuneqartutut aammalu amigaateqartutut nalilerneqarlutik, isumannaatsumik angallannermut ulorianaataasunik aammalu taamaalillutik aqqusinerni atorneqartussaanaatik.

Taamaattumik siunnersuutigineqarpoq, § 6 a, imm. 4, ilanngunneqassasoq, tamatuma kingorna, imm. 1-3 malillugit misissuinnermi qamutit imaluunniit qamutit kalittakkat misissuinnerup kingorna akuerineqanngippata, Aqqusinertigut Angallannermut Aqutsisoqarfiup atornissaat inerteqqutigisinnaagaa.

Aalajangersakkatigut siunnersuutigineqartukkut siunertarineqarpoq isumannaassallugu, Aqqusinertigut Angallannermut Aqutsisoqarfiup inerteqqutigisinnaagaa, qamutit imaluunniit qamutit kalittakkat aqqusinikkut atornissaat, kukkunerit imaluunniit amigaatit paasineqartut iluarseqqaartinnagit, misissorneqarnermikkut annertuunik kukkuneqartutut imaluunniit amigaateqartutut paasisaqarfiusut, isumannaatsumik angallannermut ulorianaateqartunik.

Aalajangersimasumik nalilersorneqartuassaaq, kukkunerit imaluunniit amigaatit paasineqartut qanoq annertutiginersut, qamutit imaluunniit qamutit kalittakkat atorneqarnissaannut inerteqquteqarnermik atuutilersitsisinnaaneq eqqarsaatigalugu.

Kiisalu § 6 a, imm. 5-ikkut siunnersuutigineqarpoq, transportministerip imm. 1-3 malillugit misissuineq pillugu malittarisassanik erseqqinnerusunik aalajangersaasinnaanera, tassunga ilaatillugu qamutitik aamma misissuiffinnik ilusilersuineq aamma nalunaaqutsiineq pillugu imm. 1 malillugu qamutitik motoorilinnik imaluunniit qamutitik kalittakkanik innersuussineq aamma ingerlatsineq.

Piginnaatitsissut Aqqusinertigut Angallannermut Aqutsisoqarfimmuttunniunneqassaaq.

Aalajangersakkatigut siunnersuutigineqartukkut Aqqusinertigut Angallannermut Aqutsisoqarfik

nalunaarummi periarfissaqalissaaq, aqquuserngup sinaani misissuinerup qanoq naammassineqarnissaa, aammalu qamutiniq motoorilinnik aamma qamutiniq kalittakkanik innersuussinissamut aamma ingerlatsinissamut aqutsiveqarfiup qanoq piginnaatitsissut atuutsissinnaaneraa pillugu sinaakkutiniq erseqqinnerusunik aalajangersaanissamut.

Inatsisissatut siunnersuummi § 1, nr. 3-mut oqaaseqaatinut immikkut ittunut innersuussisoqarpoq.

3. Pisortanut aningaasaqarnikkut kingunissai aamma atortuutilersitsinerup kingunissai

Naatsorsuutigineqarpoq inatsisissatut siunnersuut danskit naalagaaffiannut aningaasaqarnikkut kinguneqassasoq, Kalaallit Nunaannut misissuisarnermik aqqissuussinermik pilersitsinerup atattillugu, Danmarkimit isumagineqartussamik. Tamanna Aqqusinertigut Angallannerup Aqutsisoqarfimmut isumalluutitigut pisariaqartitsinerup annertunerusumik malitseqassaaq, suliaat nutaat kingunerisaannik, misissuisarnermik aqqissuussinerup pilersinneqarneranut aammalu ingerlanneqarneranut atattillugu ingerlanneqartussamik.

Aqqusinertigut Angallannerup Aqutsisoqarfiup isumalluutitigut pisariaqartitsinera suliaannik tunngaveqarpoq, makkununga attuumassutilinnik:

- Qamutiniq aamma atortunik misissuisarnermik aqqissuussinermi atorineqartussamik pisineq.
- Sulisunut garage-nik aamma allaffeqarfinnik attartorneq.
- Kalaallit Nunaanni innuttaasunut aamma inuussutissarsiortunut paasititsiniaanernik naammassinneq.
- Sulisut angalanerinit, assartuinerup, unnuinerup aamma nerisaqarnerup aningaasartuutit.
- IT-systeminut imaluunniit allamut digitali-nngortitsinerup Aqqusinertigut Angallannerup Aqutsisoqarfimmut aningaasartuutit annikinnerusut.

Aqqusinertigut Angallannerup Aqutsisoqarfiup missingiutigaa, ukiumi siullermi isumalluutiniq pisariaqartitsineq ukiuni pingasuni sulinerup naleqassasoq, Kalaallit Nunaanni ukiuni marlunni sulinerup atorfinitsitsisoqartussaassamat, aammalu Aqqusinertigut Angallannerup Aqutsisoqarfik misissuisartumik Kalaallit Nunaannukartitsisussaassamat sumiiffimmi atorfilittanik ilinniartitsisussamik. Ukiup aappaaniit aallartittumik isumalluutiniq atuineq ukiuni marlunni sulinerup naleqassaaq. Ukiuni sulinerit taakku

pisariaqartinneqassapput misissuisarnermik aaqqissuussinerup sunniuteqarluartumik atuutilersinneqarnissaa aammalu ingerlanneqarnissaa isumannaarniarlugit.

Naatsorsuutigineqarpoq inatsisissatut siunnersuut atortuulersitsinermut tunngatillugu kinguneqassasoq, inatsisissatut siunnersuutip piumasaqaatigimmagu Kalaallit Nunaanni misissuisarnermik aaqqissuussinermik nutaamik pilersitsinissaq aammalu ingerlatsilernissaq, tassunga ilaatillugit ikaarsaariarnermi aaqqissuussinerit aammalu aaqqiinerugallartut, aaqqissuussinerup tamakkiisumik atortuulersinneqarnissaata tungaanut. Tamatuma aamma malitsigissavaa Kalaallit Nunaanni innuttaasunut aamma inuussutissarsiortunut paasititsiniaanermik ingerlatsineq. Kalaallit Nunaanni misissuisarnermik aaqqissuussinermik pilersitsinermut atatillugu Aqqusinertigut Angallannermut Aqutsisoqarfimmut qaavatigut aningaasartuuteqarneruneq matussuserneqassaaq aningaasanut inatsimmi kontomik nutaamik pilersitsinikkut (§ 28.22.01.11). Qaavatigut aningaasartuutit missingiunneqarput 6,8 mio. kr. missaanniissasut ukiumi siullermi ingerlatsiviusumi, akissarsianut aamma sulisussarsiornermut, qamutiniq aamma atortunik pisiniarnermut, attartornermut kiisalu paasititsiniaanernut il. il. Ukiup aappaata aallartinneraniit ukiumut aningaasartuutissatut ataavartutut missingiunneqarput 4,3 mio. kr. missaanniissasut. Aningaasartuutit taakku ilaatigut ingerlaavartumik ingerlatsineq matussusissavaat, tassunga ilaatillugit sulisoqarnermut aningaasartuutit, qamutiniq aamma atortunik aserfallatsaaliinermut, attartornermut kiisalu angalanermut aamma assartuinermut aningaasartuutit. Aningaasartuutissatut missingiutit eqqortuunnginnissaannut margin 20 pct.-inut inissinneqarpoq, ilaatigut missingiutit eqqortuunngeratarsinnaaneri tungavigalugit aammalu aningaasartuutaanerusussatut naatsorsuutigineqarsimanngitsut tunngavigalugit, Kalaallit Nunaanni misissuisarnermik aaqqissuussinermik pilersitsinermut atatillugu.

Naatsorsuutigineqarpoq inatsisissatut siunnersuut politiit suliarinngitsuugaasa ikinnerulernissaannik malitseqassasoq qamutiniq piginnittunut imaluunniit atuisunut, inerteqquteqaraluartoq qamutiniq atuisimasinnaasunut § 6 a, imm. 4-mi siunnersuutigineqartoq malillugu, tak. angallannermut inatsimmi § 56, imm. 1 inatsisinik atuutsitsinerup kingunerisaanik. Malittarisassat atuuttut malillugit qamutiniq aquttoq qaqugukkulluunniit eqqumaffigissavaa, qamutit aamma qamutaasinnaasut kalittakkat illersorsinnaasumik inissisimanissaat, tak. § 3, imm. 3, soorluttaaq tamanna politiit aamma eqquutsittussaagaat, tak. angallannermut inatsimmi § 56. Inatsisilerinermut suliaqarfimmi inatsimmut tunngasuni saniatigut aningaasartuutaasussat aningaasaliissutit iluanni isumagineqassapput. Tamatumunnga suliaasamut atatillugu aningaasartuutaanerusinnaasut, Eqqartuussiveqarnikkut suliaasaqarfimmi aningaasaqarnikkut

sinaakkutit pioreersut iluini naammassineqarsinnaasutut nalilerneqarput. Allannguutit siunnersuutigineqartut kommunit aningaasaqarnerinut, Det udvidede Totalbalanceprincip-imut ilaatinneqartut, kinguneqartitsissanngitsut nalilerneqarpoq.

4. Inuussutissarsiortunut il. il. aningaasaqarnikkut aamma allaffissornikkut kingunissai

Inatsisissatut siunnersuut inuussutissarsiortunut aningaasaqarnikkut kinguneqarnissaa naatsorsuutigineqanngilaq, aaqqissuussineq akiliuteqartitsisarnikkut aningaasalersorneqartussaanngimmat. Aaqqissuussineq siunnersuutigineqartoq aningaasaqarnikkut naammassinngitsuukkanik kinguneqarsinnaassasoq naatsorsuutigineqarpoq, qamutit aserfallatsaalineqarnerinut aningaasartuutaanerusinnaasunik, misissuinerup kingorna teknikkikkut aamma isumannaallisaanikkut piumasagaatinik naammassininnissaat isumannaarniarlugu.

5. Innuttaasunut allaffissornikkut kingunissai

Inatsisissatut siunnersuut innuttaasunut toqqaannartunik allaffissornikkut kinguneqassanngilaq.

6. Silap pissusaanut kingunissai

Nalilerneqarpoq, inatsisissatut siunnersuut silap pissusianut annikitsumik pitsaasumik kinguneqartitsissasoq, naatsorsuutigineqarmat Kalaallit Nunaannut misissuisarnermik aaqqissuussineq, qamutit qanoq ittuunerisa pitsaanerulernerinut tapertaanissaa, annikinnerusumik mingutsitsinermik kinguneqartoq.

7. Avatangiisinut aamma pinngortitamut kingunissai

Imm. 6. silap pissusaanut kingunissat ataani naliliineq takuuk.

8. EU-mi inatsiseqarnermut tunngasut

Inatsisissatut siunnersuut EU-mi inatsiseqarnermut tunngasunik imaqqanngilaq.

9. Oqartussaqaarfiit aamma suliniaqatigiiffiit il. il. tusarniaaffigineqartut

Inatsisissatut siunnersuummut missingiut piffissami ulloq 14. november 2025-miit ulloq 12. december 2025-mut (ullut 28-t) oqartussaqaarfinnut aamma suliniaqatigiiffinnut il. il. tulluuttunut tusarniutigalugu nassiunneqarpoq: AE-Arbejderbevægelsens Erhvervsråd, ATAX Arbejdsgiverforening for persontransport, ATL (Arbejdsgiverforeningen for Transport og Logistik), Avannaata Kommunua, Dansk Arbejdsgiverforening, Dansk Erhverv, Dansk Persontransport, Danske Fragtmænd A/S, Danske Regioner, Danske Speditører (DASP), Ineqarnermut, Attaveqaasersuutitut Isorliunerusunullu Naalakkersuisoqarfik, Aalisarnermut, Piniarnermut, Nunalerinermut Imminullu Pilersornermut Naalakkersuisoqarfik, Pinngortitamut, Avatangiisinullu Naalakkersuisoqarfik, Peqqissutsimut inunnullu Innarluutilinnut Naalakkersuisoqarfik, DFIM Dansk Forening for International Motorkøretøjsforsikring, DI (Dansk Industri), Dommerforeningen, DTL – Danske Vognmænd, F&P, Fagligt Fælles Forbund – 3F, FDL - Frie Danske Lastbilvognmænd, FDM (Forenede Danske Motorejere), FH (Fagbevægelsens Hovedorganisation), Finans Danmark, Sulisitsisut, Kommune Kujalleq, Kommune Qeqertalik, Kommuneqarfik Sermersooq, Rådet for Sikker Trafik aamma Qeqqata Kommunea.

10. Skema eqikkaasoq

	Kingunissai pitsaasut/aningaasartuutit annikinnerusut (aappiuppat, annertussuseq taallugu/naamiuppat, »Soqanngilaq« allallugu)	Kingunissai pitsaanngitsut/aningaasartuutit annertunerusut (aappiuppat, annertussuseq taallugu/naamiuppat, »Soqanngilaq« allallugu)
Naalagaaffimmut, kommuninut aamma nunap immikkoortuinut aningaasaqarnikkut kingunissai	Soqanngilaq	Kalaallit Nunaanni misissuisarnermik aaqqissuussinermik nutaamik

		pilersitsinermut aamma ingerlatsinermut atatillugu Færdselsstyrelsenimut qaavatigut aningaasartuutissat. Aningaasartuutissat missingiunneqarput katillugit 6,8 mio. kr. missaanniissasut ukiumi siullermi, tamatumalu kingorna ukiumut 4,3 mio. kr. missaanniissallutik.
Naalagaaffimmut, kommuninut aamma nunap immikkoortuinut atortuulersitsinerup kingunissai	Soqanngilaq	Aap, ukiumi siullermi isumalluutini pisariaqartitsineq ataatsimut isigalugu ukiumut sulinernik pingasunik naleqassaaq, Kalaallit Nunaanni ukiumut sulinernut marlunnut atorfinitsitsisoqartussaammat, Færdselsstyrelsenilu misissuisartumik Kalaallit Nunaannut suliaortitsissalluni tassani najukkani atorfilinnut ilinniartitsisussamik. Ukiup aappaata allartinneraniit Kalaallit Nunaanni isumalluutini atuneq ukiumut sulinernik marlunnik naleqassaaq.
Inuussutissarsiortunut il. il. aningaasaqarnikkut kingunissai	Soqanngilaq	Aaqqissuussineq siunnersuutigineqartoq aningaasaqarnikkut

		naammassinngitsuukkanik kinguneqarsinnaassasoq naatsorsuutigineqarpoq, qamutit aserfallatsaalineqarnerinut anigaasartuutaanerusingnaasunik, misissuinerup kingorna teknikkikkut aamma isumannaallisaanikkut piumasaqaatinik naammassininnissaat isumannaarniarlugu.
Inuussutissarsiortunut il. il. allaffissornikkut kingunissai	Soqanngilaq	Soqanngilaq
Innuttaasunut allaffissornikkut kingunissai	Soqanngilaq	Soqanngilaq
Silap pissusaanut kingunissai	Nalilerneqarpoq, inatsisissatut siunnersuut silap pissusianut annikitsumik pitsaasumik kinguneqartitsissasoq, naatsorsuutigineqarmat Kalaallit Nunaannut misissuisarnermik aaqqissuussineq, qamutit qanoq ittuunerisa pitsaanerulernerinut tapertaanissaa, annikinnerusumik mingutsitsinermik kinguneqartoq.	Soqanngilaq
Avatangiisinut aamma pinngortitamut kingunissai	Nalilerneqarpoq, inatsisissatut siunnersuut silap pissusianut annikitsumik pitsaasumik	Soqanngilaq

	kinguneqartitsissasoq, naatsorsuutigineqarmat Kalaallit Nunaannut misissuisarnermik aaqqissuussineq, qamutit qanoq ittuunerisa pitsaanerulernerinut tapertaanissaa, annikinnerusumik mingutsitsinermik kinguneqartoq.	
EU-mi inatsiseqarnermut tunngasut	Inatsisissatut siunnersuut EU-mi inatsiseqarnermut tunngasunik imaqanngilaq.	
EU-mi inuussutissarsiornermut inatsisinik atortuulersitsinermut tunngavinnut tallimanut naapertuutinngilaq (attuomassuteqarfiini aamma EU- mi inatsisinik inuussutissarsiornermut tunngasuunngitsunik atortuulersitsinermut atuuttoq) (X-ileruk)	Naamik	Naamik

*Inatsisissatut siunnersuummi aalajangersakkanut ataasiakkaanut oqaaseqaatit**§ 1-imut*

Nr. 1-imut

Angallannermut inatsimmi § 6, imm. 2, oqaaseqatigiit 1.-p kingunerivaa, politiit qaqugukkulluunniit piumasarisinnaagaat, qamutit motorillit imaluunniit qamutit, qamutitik motorilinnit kalinneqarnissamut aalajangiussat, misissugassanngussasut, angallannermut inatsimmi piumasaqaatinik imaluunniit inatsit tunngavigalugu aalajangersakkanik naammassinninneri pillugit nalilersorneqarnissaat siunertaralugu.

Imm. 2, oqaaseqatigiit 1.-mi siunnersuutigineqarpoq »qamut, qamutitik motorilinnit kalinneqartussatut aalajangiussaq« imatut allanngortinneqassasoq: »qamutit kalittakkat«, aamma »misissuineq« imatut allanngortinneqassasoq: »misissuineq«.

Aalajangersakkatut siunnersuutigineqartoq aalajangersakkami oqaatsitigut nutarsaanermik kinguneqassaaq aammalu imarisatigut kinguneqassanani.

Nr. 2-mut

Angallannermut inatsimmi § 6, imm. 3, oqaaseqatigiit 1.-p kingunerivaa, politiit qamutitik atuinissaq inerteqqutaatissinnaagaat aammalu nummerpladit peersinnaallugit, imm. 1 imaluunniit 2 malillugit misissuineri piumasaqaatit atuuttut naammassineqarsimanngippata.

Imm. 3, oqaaseqatigiit 1.-mi siunnersuutigineqarpoq »misissuineq« imatut allanngortinneqassasoq: »misissuineq«.

Aalajangersakkatut siunnersuutigineqartoq aalajangersakkami oqaatsitigut nutarsaanermik kinguneqassaaq aammalu imarisatigut kinguneqassanani.

Nr. 3-mut

Angallannermut inatsimmi § 6, imm. 1-ip kingunerivaa, politiit qamutitik unitsitsinissamut aamma qamutit kukkuneqarnersut aammalu amigaateqarnersut misissornissaannut inatsisitigut tunngaveqarnerat.

Transportministeri ullumikkut angallannermut inatsimmi § 6, imm. 2, oqaaseqatigiit aappaani inatsisitigut tunngaveqarpoq, piffissani aalajangersimasuni qamutitik motoorilinnik imaluunniit qamutitik qamutinit motoorilinnik kalinneqarnissamut aalajangikkanik misissuisarneq pillugu aalajangersakkanik aalajangersaanissamut. Tamanna piginnaatitsissut Aqqusinertigut Angallannermut Aqutsisoqarfiup suliaasai aamma piginnaatitaaffii kiisalu maalaaruteqarsinnaaneq pillugu nalunaarummi § 4 malillugu Aqqusinertigut Angallannermut Aqutsisoqarfimmut tunniunneqarpoq.

Aqqusinertigut Angallannermut Aqutsisoqarfiup piffissani aalajangersimasuni qamutitik motoorilinnik imaluunniit qamutitik qamutinit motoorilinnik kalinneqarnissamut aalajangikkanik misissuisarneq pillugu aalajangersakkanik aalajangersaanissamut piginnaatitsissut atorsimangila.

§ 6 a, imm. 1-imi aalajangersakkami nutaami siunnersuutigineqarpoq, Aqqusinertigut Angallannermut Aqutsisoqarfik qamutitik motoorilinnik imaluunniit qamutitik qamutinit motoorilinnik kalinneqarnissamut aalajangikkanik unitsitsinissamut misissornissaat siunertaralugu aamma tamatumunnga atatillugu sumiiffimmut misissuiffissamut innersuussinissamut aammalu ingerlatsinissamut. Aqqusinertigut Angallannermut Aqutsisoqarfiup tamatumunnga atatillugu usinik inissiineq misissorsinnaavaa § 38, imm. 3 naapertorlugu.

Aalajangersakkatigut siunnersuutigineqartukut Aqqusinertigut Angallannermut Aqutsisoqarfik nalunaaruteqaqqaarani qamutitik teknikkikkut misissuinissamut inatsisitigut tunngaveqalissaaq, tassani qamutit teknikkikkut qanoq issusaat misissorneqassalluni. Misissuineq Kalaallit Nunaanni qamutit aqqqissuussaani aamma atortui pillugit nalunaarummi nr. 141, 27. marts 1979-imeersumi malittarisassat kingornalu allannguutaat malillugit ingerlanneqassaaq.

Aqqqissuussinikkut siunnersuutigineqartukut Aqqusinertigut Angallannermut Aqutsisoqarfik taamaallaat inatsisitigut tunngaveqalissaaq qamutitik unitsitsinissamut aqquserngup sinaani misissuinissaq siunertaralugu kiisalu sumiiffimmut misissuiffissamut innersuussinissamut aammalu ingerlatsinissamut. Sumiiffik misissuiffissaq taamaallaat tassani illoqarfimmi imaluunniit nunaqarfimmi, Aqqusinertigut Angallannermut Aqutsisoqarfiup qamutitik imaluunniit qamutitik kalittakkanik unitsitsiffissaani inissinneqarsinnaavoq. Taamaalilluni piumasaqaataasinnaassanngilaq, qamutit imaluunniit qamutit kalittakat misissorniarlugit illoqarfimmut imaluunniit nunaqarfimmut allamut assartorneqarnissaat.

Taamaattoq aquttup innersuussutigineqartoq malinnianngippagu, Aqqusinertigut Angallannermut Aqutsisoqarfik qamutit malersornissaannut imaluunniit misissuinissap pinngitsaaliissutiginiisaanut piginnaatitaassanngilaq soorlu politiit taamaaliorsinnaasut § 6, imm. 1 atuuttoq malillugu.

Danskit aqquserngup sinaani misissuisarnermik aqqissuussaannit, ilaatigut qamutitik usissutitik aamma bussinik misissuinermik ilaqartartumit, misilittakkat takutippaat, aquttut amerlanerpaartaat kajumillutik misissuinermut peqataasarnerat.

Aammattaaq misissuinerup ilagissavaa, usit assartorneqartut imatut inissinneqarsimanersut aammalu aalajangerneqarsimanersut, sisutissinnaajunnaarlugit, nakkartissinnaajunnaarlugit imaluunniit pisariaqanngitsumik nipiliortissinnaajunnaarlugit inissinneqarsimaneritik, taamaalillutillu aquttumut aamma angallattunut allanut ulorianaateqarsinnaaneritik imaluunniit pigisanut ajoqusiisinnaaneritik nalilersuineq.

Misissuinerup kingorna akuerineqarnermi qamutit akuerisaanerup meqqianik tunineqassapput.

Akuerisaanermi meqqiliisarnermik aqqissuussinerup erseqqinnerusumik qimerloornissaanut inatsisissatut siunnersuummi § 1, nr. 3-mut oqaaseqaatit, aammalu siunnersuutigineqartoq § 6 a, imm. 5, innersuussutigineqarput.

Qamutit misissuinermi akuerineqanngippata, Aqqusinertigut Angallannermut Aqutsisoqarfiup nalilersuilluareernermigut, siunnersuutigineqartoq § 6 a, imm. 4 malillugu, qamutit atorineqarnissaannut inerteqquteqarneq inassutigisinnaavaa.

Inerteqquteqarnermik unioqqutitsinerup kingunerisassai erseqqinnerusut pineqartillugit, inatsisissatut siunnersuummi § 1, nr. 3, aammalu siunnersuutigineqartoq § 6 a, imm. 4 innersuussutigineqarput.

Imm. 2-mi siunnersuutigineqarpoq, imm. 1 malillugu misissuineq naammassineqarsinnaanngippat, Aqqusinertigut Angallannermut Aqutsisoqarfiup qaqugukkulluunniit qamutit imaluunniit qamutit kalittakkat misissuiffissami taaneqartumi misissugassanngortinneqarnissaat piumasarisinnaavaa.

Pisoqarsinnaassaaq, aqquserngup sinaani misissuinissaq naapertuuttuunani imaluunniit naammassineqarsinnaanani. Aalajangersakkap Aqqusinertigut Angallannermut Aqutsisoqarfik inatsisitigut tunngavimmik tunissavaa, qamutitik misissugassanngortitsinissamut pissutsini atoruminartuni aammalu teknikkikkut illersorneqarsinnaasuni.

Aalajangersakkatut siunnersuutigineqartoq atorlugu Aqqusinertigut Angallannermut Aqutsisoqarfiup qamutitik piginnittoq imaluunniit aquttoq isumaqatigiissuteqarfigisinnaassavaa, qaqugu misissuineq nutaaq naammassineqassanersoq. Sumiiffimmi misissuinissaq nutaaq isumaqatigiissutigineqarsinnaanngippat, Aqqusinertigut Angallannermut Aqutsisoqarfiup piumasarisinnaassavaa piffissami kingusinnerusumi qamutit misissugassanngortinneqarnissaat.

Aalajangersagaq aamma atuussinnaassaaq pisuni, Aqqusinertigut Angallannermut Aqutsisoqarfiup aqquserngup sinaani qamutitik misissuinissamik innersuussinerani, kisiannili paasineqarluni, misissuinissap naammassineqarnissaa naapertuutinnngitsoq. Assersuutigalugu tamanna pilersinnaassaaq, sullinneqartup ataatsip imaluunniit arlallit qamutitik ingerlanneqarnerini, isumaqatigiissummi pisussaaffimmik sumiginnaasoqassasoq imaluunniit umiarsuarmut ikaartaammut ilaanissamut inortuisoqassasoq, qamutit aqquserngup sinaani misissorneqassappata.

Aalajangersagaq aamma atuussinnaassaaq pisumi, silarlunna pissutigalugu misissuineq, assersuutigalugu sannavimmi qanittumiittumi naammassineqartussanngorluni.

Aammattaaq pisoqarsinnaassaaq, qamutit qanoq ittuunerisa peqqissaarnerusumik misissorneqarnissaat pisariaqalersoq, taamaattumillu misissuinissaq aqquserngup sinaani naammassineqarsinnaanngitsutut nalilerneqarluni.

Aalajangersagaq aamma atuussinnaassaaq pisumi, sumiiffimmi aamma piffissami taaneqartuni misissuinerup tamakkerlugu ingerlanneqarnissaa pisariaqalerluni, nunap sannaa aamma atugassarititaasut pissutigalugit.

Misissuinermi qamutit akuerineqarpata, qamutit akuerisaanerup meqqianik ikkussiffigineqassapput.

Akuerisaanermi meqqiliisarnermik aqqissuussinerup erseqqinnerusumik qimerloorneqarnissaanut inatsisissatut siunnersuummi § 1, nr. 3, aammalu siunnersuutigineqartoq § 6 a, imm. 5 innersuussutigineqarput.

Qamutit misissuinermi akuerineqanngippata, Aqqusinertigut Angallannermut Aqutsisoqarfiup nalilersuilluareernermigut, siunnersuutigineqartoq § 6 a, imm. 4 malillugu, qamutit atorineqarnissaannut inerteqquteqarneq inassutigisinnaavaa.

Inerteqquteqarnermut unioqqutitsinerup kingunerisassai erseqqinnerusut pineqartillugit, inatsisissatut siunnersuummi § 1, nr. 3, aammalu siunnersuutigineqartoq § 6 a, imm. 4 innersuussutigineqarput.

Imm. 3-mi siunnersuutigineqarpoq, Aqqusinertigut Angallannermut Aqutsisoqarfik qamutitik motoorilinnik imaluunniit qamutitik kalittakkanik uninngasunik misissuisinnaasoq, piginnittoq imaluunniit atuisoq tamatumunnga akuersippat. Pisumi, pisisoq imaluunniit atuisoq akuersinngippata, Aqqusinertigut Angallannermut Aqutsisoqarfiup qaqugukkulluunniit qamutit imaluunniit qamutit kalittakkat misissuiffissami taaneqartumi misissugassanngortinneqarnissaat piumasarisinnaavaa.

Aaqqissuussatigut siunertaavoq, Aqqusinertigut Angallannermut Aqutsisoqarfiup misissuisartui Kalaallit Nunaanni qamutitik misissuillutik angalanissaat. Aammattaaq aaqqissuussineq imatut eqaatsigissaaq aamma sunniuteqarluartigissaaq qamutit sapinngisamik amerlanersaasa misissorneqarnissaat isumannaassallugu.

Taamaattumik pisoqartassaaq, misissuisartut aqquserngup sinaani naapitarinngisaannik qamutitik misissuinissaq pisariaqartinneqarluni.

Aalajangersakkami siunnersuutigineqartumi oqaaseqatigiit 1.-p kingunerissavaa, Aqqusinertigut Angallannermut Aqutsisoqarfiup kisimiilluni qamutitik uninngasunik misissuisinnaanera, tamatumunnga akuersaartoqarpat. Imatut pisoqartassaaq, piginnittoq imaluunniit inuk taanna, qamutitik atuisoq, misissuinerup naammassineqarnissanut oqaasiinnakkut akuersisoq.

Misissuineq assersuutigalugu qamutit unittarfiini ingerlanneqarsinnaavoq, pisiniarfiit eqqaanni imaluunniit atuarfiit imaluunniit ilinniariit eqqaanni, qamutit akulikitsumik uninngaffigisartagaanni, aamma misissuinerup oqitsumik aammalu sunniuteqarluartumik naammassineqarfigisinnaasaanni.

Aamma naatsorsuutigineqarpoq aaqqissuussineq najugaqarfinni atorineqartassasoq, illut aamma inissiat isaariaasa saavanni qamutit uninngasarfiini. Tamatumunnga atatillugu Aqqusinertigut Angallannermut Aqutsisoqarfiup misissuisartui toqqaannartumik innuttaasunut inaata saavini imaluunniit matuata saavini saaffiginnissinnaassapput aperiniarlutik, qamuteqarnersut akuersineritigut misissorneqarsinnaasunik.

Qamutit nalunaarutigineqarnikut taamaallaat misissorneqarsinnaassapput. Politiit tassaapput, Kalaallit Nunaanni qamutitik nalunaarutiginnittarneq pillugu malittarisassanik atuutsitsisut. Pisumi, Aqqusinertigut Angallannermut Aqutsisoqarfik qamutit nalunaarsorneqarsimaneri pillugit nalornitillugu, Kalaallit Nunaanni politiit tamatumunnga paasissutissanik pissarsiffigineqassapput.

Assersuutigalugu pisinnaavoq, tamat unittarfianni qamutit uninngasut, nummerpladii peerneqarsimallutik.

Aalajangersakkami siunnersuutigineqartumi oqaaseqatigiit 2.-ta kingunerissavaa, Aqqusinertigut Angallannermut Aqutsisoqarfiup piumasarisinnaagaa, misissuiffissami taaneqartumi qamutit misissugassanngortinneqarnissaat, piginnittoq imaluunniit atuisoq oqaaseqatigiit 1. malillugu akuersinngippat.

Misissuinermi qamutit akuerineqarpata, qamutit akuerisaanerup meqqianik ikkussiffigineqassapput.

Akuerisaanermi meqqiliisarnermik aaqqissuussinerup erseqqinnerusumik qimerloorneqarnissaanut inatsisissatut siunnersuummi § 1, nr. 3, aammalu siunnersuutigineqartoq § 6 a, imm. 5 innersuussutigineqarput.

Qamutit misissuinermi akuerineqanngippata, Aqqusinertigut Angallannermut Aqutsisoqarfiup nalilersuilluareernermigut, siunnersuutigineqartoq § 6 a, imm. 4 malillugu, qamutit atorineqarnissaannut inerteqquteqarneq inassutigisinnaavaa.

Inerteqquteqarnermut unioqqutitsinerup kingunerisassai erseqqinnerusut pineqartillugit, inatsisissatut siunnersuummi § 1, nr. 3, aammalu siunnersuutigineqartoq § 6 a, imm. 4 innersuussutigineqarput.

Imm. 4-mi siunnersuutigineqarpoq, imm. 1-3 malillugit misissuinermi qamutit imaluunniit qamutit kalittakkat akuerineqanngippata, Aqqusinertigut Angallannermut Aqutsisoqarfiup atorineqarnissaat inerteqqutigisinnaavaa.

Aalajangersakkatigut siunnersuutigineqartukkat siunertarineqarpoq isumannaassallugu, Aqqusinertigut Angallannermut Aqutsisoqarfiup inerteqqutigisinnaagaa, qamutit imaluunniit qamutit kalittakkat aqqusinikkut atornissaat, kukkunerit imaluunniit amigaatit paasineqartut iluarseqqaartinnagit, misissorneqarnermikkut annertuunik kukkuneqartutut imaluunniit amigaateqartutut paasisaqarfiusut, isumannaatsumik angallannermut ulorianaateqartunik.

Aalajangersimasumik nalilersorneqartuassaaq, kukkunerit imaluunniit amigaatit paasineqartut qanoq annertutiginersut, qamutit imaluunniit qamutit kalittakkat atorineqarnissaannut inerteqquteqarnermik atuutilersitsisinnaaneq eqqarsaatigalugu.

Assersuutigalugu aalajangersagaq atorineqarsinnaassaaq pisuni, qamutit imaluunniit qamutit atortui kukkuneqarneri aamma amigaateqarneri pissutigalugit akuerineqarsinnaanatik, soorlu assakaasut imaluunniit aquutit ikkusimanerini annertuumik qasunganeqarmata, assakaasut nungullarsimmamata,

bremsit imaluunniit bremsit unittaatit ajormata kiisalu qamutit annertuunik aammalu ulorianartunik kukkuneqarmata.

Inerteqquteqarnerup aallaavittut kingunerissavaa, qamutit imaluunniit qamutit kalittakkat taamaallaat iluarsaassisarfirmmut qaninnerpaamut ingerlanneqarsinnaaneri, kukkunerit aamma amigaateqarnerit inerteqquteqarnermut pissutaasut aaqqinneqarnissaat siunertaralugu.

Pisut ilaanni kukkuneqarnerit aamma amigaateqarnerit paasineqartut imatut ajortigisinnaapput, inerteqquteqarnermut pissutaasut, assersuutigalugit bremsit ajormata, aquutit ajormata aamma assakaasut ikkusimaneri qasunganeqarmata, misissuisartut nalileraat, qamutit imaluunniit qamutit kalittakkat iluarsaassisarfirmmut qaninnerpaamut ingerlanneqarnissaat illersorneqarsinnaanngitsaq, isumannaatsumik angallannissaq eqqarsaatigalugu. Pisuni taamaattuni inerteqquteqarnerup kingunerissavaa, iluarsaassinerup sumiiffigisami ingerlanneqarnissaa, imaluunniit qamutit imaluunniit qamutit kalittakkat iluarsaassisarfirmmut kalinneqarnissaat.

Aqqusinertigut Angallannermut Aqutsisoqarfiup atuinissamut inerteqquteqartitsinertik pillugu politiit ilisimatissavaat.

Siunnersuutigineqartoq § 6 a, imm. 4 malillugu inerteqquteqarnermik eqquutsitsinnginnermut, angallannermi inatsimmi § 56, imm. 1 atuutissaaq, tassami aquttup inatsit naapertorlugu inerteqquteqarneq malinngimmagu. Inerteqquteqarnermik taamaattumik politiit atuutsitsisuussapput.

Atuinissamut inerteqquteqarneq atuutissaaq, kukkunerit aamma amigaateqarnerit paasineqartut, inerteqquteqarnermut pissutaasut, aaqqinneqarnissaasa tungaannut. Tamatuma isumannaarneqarnissaanut piginnittoq imaluunniit aquttoq akisussaasuupput. Aaqqissuussinikkut siunnersuutigineqartukkut siunertaanngilaq, qamutit nutaamik misissorneqaqqaassasut, ingerlatsinissamut inerteqquteqarnerup atorunnaarsinneqarsinnaanissaanut. Tamatumunnga tunngaviupput aaqqissuussinerup eqaatsuunissaa aammalu eqaatsumik ingerlatsinissap isumannaarneqarnissaa, piffissaq ingerlasinnaammat Aqqusinertigut Angallannermut Aqutsisoqarfiup tulliani illoqarfimmut tikinnissaata tungaanut.

Imm. 5-imi siunnersuutigineqarpoq, imm. 1-3 malillugit misissuineq pillugu aamma imm. 1 malillugu Aqqusinertigut Angallannermut Aqutsisoqarfiup qamutitik motoorilinnik imaluunniit qamutitik kalittakkanik unitsitsinnaanera, innersuussisinnaanera aamma ingerlatsisinnaanera pillugit transportministeri malittarisassanik erseqqinnerusunik aalajangersaasinnaanera, tassunga ilaatillugit

Aqqusinertigut Angallannermut Aqutsisoqarfiup qamutaanik aamma misissuiffiiniq ilusilersuineq aamma nalunaaqutsiineq.

Aqqusinertigut Angallannermut Aqutsisoqarfiup aaqqissuussineq aquttussaammagu, siunnersuutigineqartoq imm. 5 malillugu piginnaatitsineq Aqqusinertigut Angallannermut Aqutsisoqarfimmut tunniunneqassaaq, tak. § 72, imm. 1.

Siunertaavoq, Aqqusinertigut Angallannermut Aqutsisoqarfik nalunaarummik pilersitsissasoq, § 6 a, imm. 1-3 malillugit misissuinerup qanoq naammassineqarnissaanut malittarisassanik erseqqinnerusunik aalajangersaasussamik.

Naatsorsuutigineqarpoq, imm. 1-3 malillugit misissuinerup kingorna akuersissuteqarnermi, Aqqusinertigut Angallannermut Aqutsisoqarfiup qamutitut akuerisaanerup meqqianik ikkussisarnissaa pillugu malittarisassanik aalajangersaanissaq. Aammattaaq naatsorsuutigineqarpoq, akuerisaanerup meqqiani allaqqassasoq, qanga qamutit akuerisaasimanerat.

Aaqqissuussinerup isumannaassavaa, Aqqusinertigut Angallannermut Aqutsisoqarfiup misissuisartuisa sunniuteqarluartumik aamma sukkasuumik paasisinnaassagaat, qamutit sorliit akuerisaasimanersut, tassunga ilaatillugit misissuineq qanga pisimanersoq, aamma sorliit misissorneqarsimannginnersut.

Tamatuma saniatigut, politiit najuutsinnagit qamutit aqquerngup sinaani misissorneqarnissaannut innersuussinissamut aamma ingerlatsinissamut Aqqusinertigut Angallannermut Aqutsisoqarfiup piginnaatitsissummik qanoq atuutsitsinissaa pillugu malittarisassanik aalajangersaasoqassaaq.

Tamatuma saniatigut inatsisissatut siunnersuummi § 1, nr. 3-mut, aammalu siunnersuutigineqartumi § 6 a, imm. 1-imut oqaaseqaatit innersuussutigineqarput.

Siunertaavoq, siunnersuutigineqartut § 6 a, imm. 2 aamma 3, oqaaseqatigiit 2.-at, malillugit Aqqusinertigut Angallannermut Aqutsisoqarfiup qanoq kingornatigut misissueqqinneq pillugu nalunaaruteqartarnissaa pillugu malittarisassanik aalajangersaanissaq.

Naatsorsuutigineqarpoq, tamanna pisassasoq nalinginnaasuusussamik allakkatigut nalunaaruteqartarnikkut, misissuinerup piffissaanik aamma sumiiffianik nassuiaanermik ilaqartumik.

Aammattaaq siunertarineqarpoq, misissuinerup uppersaataa, Aqqusinertigut Angallannermut Aqutsisoqarfiup misissuiffissat erseqqissumik nalunaaqutsersornissaannut periarfissaa kiisalu misissuisartup

misissuiffimmi aamma misissuiffissap tungaanut ingerlanermi piginnaatitsissummik atuutsitsinera pillugu aalajangersakkat pillugit malittarisassat erseqqinnerusut nalunaarutip aalajangersaavigissagai.

Aalajangersakkatigut ilaatigut siunertarineqarpoq angallattut eqeersimaarnerunissaat, kiisalu misissuisartut aqquuserngup sinaani sulitillutik isumannaannerunissaat.

Siunertaavoq, nalunaarut aalajangersakkanik imaqqassasoq, aqquuserngup sinaani misissuinnermut atatillugu qullernik aappaluttunik arajutsisassaannngitsunik aamma refleksinik atuinissamut Aqqusinertigut Angallannermut Aqutsisoqarfimmut periarfissiisunik. Tamatumani siunertaavoq aqquuserngup sinaani misissuineq pillugu angallattut eqeersimaarnerunissaat, aammalu taamaaqataanik misissuisartut sulineramik ingerlatsinerini isumannaassusaasa qulakkeerreqarnissaat. Qulliit aappaluttut arajutsisassaannngitsut aamma refleksit Aqqusinertigut Angallannermut Aqutsisoqarfiup qamutaasa aamma sumiiffiit misissuiffiisa erseqqinnerunissaannut tapertaassapput, sualummik silarlutsillugu imaluunniit sila taartillugu.

Aammattaaq siunertaavoq, aqquuserngup sinaani misissuiffissatut piukkunnaateqartut nalunaaqutsersorneqarsinnaanerat, soorlu allagartanik aamma qummukujuunik nalunaaqutsiisunik, nalunaaqutsersorneqarsinnaaneri pillugit nalunaarut aalajangersakkamik imaqqassasoq. Nalunaaqutsersuineq sumiiffimmi pissutsinut aamma pisariaqartitanut naleqqussagaassaaq, sumiiffiit misissuiffiusut eqqaani angallannerup erseqqissumik aamma isumannaatsumik ingerlanneqarnissaa isumannaarniarlugu.

Taamaaqataanik aamma siunertaavoq, aqquuserngup sinaani misissuinnermut atatillugu misissuisartut allagartanik unitsitsissutinik aamma LED-allagartanik atuisinnaaneri pillugit aalajangersakkamik nalunaarut imaqqassasoq. Atortorissaarutit tamakkua angallattut aqqutissaannut tikkuunnissaannut atorneqassapput aammalu isumannaarissallutik qamutit isumannaatsumik aammalu naapertuuttumik uninnissaannut, misissuinissamut innersuunneqaraangamik.

Aqqusinertigut Angallannermut Aqutsisoqarfik nakkutiginninnermi oqartussaqaarfittut sulianut teknikkikkut ilisimasaqarmat, naatsorsuutigineqarpoq oqartussaqaarfiup aalajangiineri pillugit maalaaruteqarsinnaanermut periarfissaaq, siunnersuutigineqartoq § 6 a, imm. 5 malillugu, nalunaarut pilersinneqartoq malillugu, § 72, imm. 2 malillugu atorunnaassasoq.

Taamaattoq Aqqusinertigut Angallannermut Aqutsisoqarfik ingerlatsinnermut oqartussaqaarfittut suli pisussaaffinnut nalinginnaasunut ilaatinneqassaaq nammineq aalajangikkani

suliassanngorteqqissinnaallugit aammalu allanngorteqqissinnaallugit, tamakkununnga tunngavissaqartoqartillugu.

Aamma inatsisissatut siunnersuummi immikkoortoq 2.1.2-mut oqaaseqaatit innersuussutigineqarput.

§ 2-mut

Siunnersuutigineqarpoq, inatsit atuutilissasoq ulloq [1. januar 2027].

Inatsisissatut siunnersuutip inatsimmut atuuttumut sanilliunnera

<i>Oqaasertaliussat atuuttut</i>	<i>Inatsisissatut siunnersuut</i>
	§ 1 Kalaallit Nunaannut angallannermut inatsimmi, tak. inatsimmut nalunaarut nr. 995, 26. oktober 2009-meersoq, tulluuttunik allannguisoqassaaq:
§ 6. --- <i>Imm. 2.</i> Politiit sukkulluunniit pisinnaatitaapput qamut motorimik ingerlateqartoq qamulluunniit qamummit motorimik ingerlatilimmit kalitassatut naatsorsuunneqartoq aggruteqqusinnaallugu inatsit manna imaluunniit inatsit manna malillugu aalajangersakkanik naammassinnissimanersoq paasiniaarlugu misissugassatut. Qamutit taamaattut piffissanngoraangat misissorneqartarnissaat pillugu transportministeri aalajangersagalorsinnaavoq.	1. § 6, imm. 2, oqaaseqatigiit 1.-mi »qamut, qamutinit motoorilinnit kalinneqartussatut aalajangiussaq« imatut allanngortinneqassaaq: »qamutit kalittakkat«, aamma »misissuineq« imatut allanngortinneqassaaq: »misissuineq«.
<i>Imm. 3.</i> Qamut imm. 1 aamma imm. 2 malilugit misissorneqarnermini piumasarineqartunik naammassinnissimanngippat atorneqarnissaa politiit inerteqqutigisinnaavaat normulerfialu peersinnaallugu. Aamma taama iliortoqassaaq imm. 2 malillugu aggruteqquneqaraluarluni aggruunneqanngitsoorpat.	2. § 6, imm. 3, oqaaseqatigiit 1.-mi »misissuineq« imatut allanngortinneqassaaq: »misissuineq«.

	3. § 6-ip kingorna ilanngunneqassaaq: »§ 6 a. Aqqusinertigut Angallannermut Aqutsisoqarfiup qamutit motoorillit aamma qamutit kalittakkat misissornissaat siunertaralugu unitsissinnaavai, aammalu tassunga atatillugu taakku sumiiffimmut misissuiffissamut innersuullugit aammalu ingerlallugit. Tassungalu atatillugu Aqqusinertigut Angallannermut Aqutsisoqarfik § 38, imm. 3 naapertorlugu usinik ilisaqarnikkut misissuisinnaavoq. <i>Imm. 2.</i> Imm. 1 malillugu misissuineq naammassineqarsinnaanngippat, Aqqusinertigut Angallannermut Aqutsisoqarfiup qaqugukkulluunniit piumasarisinnaavaa, qamutit imaluunniit qamutit kalittakkat misissuiffimmi taaneqartumi misissorneqassasut. <i>Imm. 3.</i> Aqqusinertigut Angallannermut Aqutsisoqarfik qamutitik imaluunniit qamutitik kalittakkanik uninngasunik misissuisinnaavoq, piginnittoq imaluunniit atuisoq tamatumunnga akuersippata. Piginnittoq imaluunniit atuisoq akuersissanngikkaluarpat, Aqqusinertigut Angallannermut Aqutsisoqarfiup piumasarisinnaavaa, qamutit misissuiffimmi taaneqartumi misissorneqassasut. <i>Imm. 4.</i> Qamutit imaluunniit qamutit kalittakkat imm. 1-3 naapertorlugit misissuinermit akuerineqanngippata, atorneqarnissaat
--	--

	Aqqusinertigut Angallannermut Aqutsisoqarfiup inerteqqutigisinnaavaa. <i>Imm. 5.</i> Imm. 1-3 malillugit misissuineq pillugu Transportministeri malittarisassanik erseqqinnerusunik aalajangersaasinnaavoq, Aqqusinertigut Angallannermut Aqutsisoqarfiup imm. 1 malillugu qamutitut motoorilinnut aamma qamutitut kalittakkanut innersuussisinnaanera aammalu ingerlatsisinnaanera pillugit, tassunga ilaatillugit misissuiffinnik aamma qamutunik ilusiliineq aamma nalunaaqutsiineq.«
--	--